

Apeqquteqaat aallaavigalugu oqallisissiaq: Atugarliuutit kingornunneqartartut qaangerniarlugit qanoriliortoqarsinnaava, taamaalillutik atukkaminnik allannguerusuttut ajunnginnerusumik inuuneqalernissaminut alloriarnissaannut ikiorniassagaanni?

(Inatsisartunut ilaasortaqaq Niels Thomsen, Demokraatit)

Akissuteqaat

(Isumaginninnermut Naalakkersuisoq)

Atugarliuutit kingornunneqartartut qaangerniarlugit qanoq iliortoqarsinnaava? Apeqqut imaannaanngitsurojussuuvoq, ullumikkut imaaliinnarlugu akineqarsinnaanngitsoq, kisiannili imaanngilaq qulequtap oqallisiginissaa piffissamik asuli atuilussinnarnerussasoq. Taamaanngilarli. Inuiaqatigiinnik ingerlalluarnerusunik siunissami pilersitsissagutta, kinguaariit inooriaatsimikkut kingornuttagaasa nuanniitsut annertuumik iliuuseqarfigineqarnissaat, aalajangiisuussaaq. Niels Thomsenip apeqqutaa taamaammat soqutiginarlunilu pingaaruteqarpoq.

Inuiaqatigiinni meerartatta inuusuttortattalu atugarisaasa periarfissaasalu pitsanngorsaaviginissaat Naalakkersuisut tamarmiullutik immikkut pingaartillugu soqutigisarilluinnarpaat: Angorusutarput unaavoq, tassalu meeqqat tamarmik toqqissisimasumik inuuneqarnissaminut aamma periarfissaqartitaanissaat.

Inuiaqatigiinnik ingerlalluarnut pilersitsissagutta naammasseqqaagassaq tassaavoq inuiaqatigiittut meerartatta meeraanermi pitsaasumik atugaqartinnissaat qulakkiissallugu – aamma meeqqat arlaannik pissuteqartumik angajoqqaaminnit nukissaqarfigineqanngitsut ilanngullugit.

Taamaattumik anaanngortussat atugarissaanngitsut meerartaannginneranni tapersorsornissaat aaliangiisuulluinnassaaq, Naalakkersuisullu suliniutit taakkununga sammititat annertuumik pingaartitaraat, tassaasut aaqqissugaasumik suliniut “Ilaqutariit naartusortallit siusissukkut suliniuteqarfiginerat” aamma angajoqqaanut atuartitsineq “Meeqqamut piareerseq”. Aammattaaq pingaaruteqarpoq suliniutit taakku pillugit pisortaqaarfiit suliamut attuumassuteqarsinnaasut akunnerminni suleqatigiilluarnissaat

Meeqqamut aseruutaasorujussuusinnaasut ilagaat kinguaassiutitigut atonerlugaaneq. Taamaammat Naalakkersuisut Inatsisartut peqatigalugit kinguaassiutitigut atonerlugaasimasunut katsorsaaneq pitsanngorsaaviginiarlugu sulissutiginiarpaat, taammaliornikkut aamma atonerluinerit annikillisinneqarnissaat anguneqarsinnaammat. Aamma kinguaassiutitigut atonerlunneqarsimasut katsorsarneqarnissaat pisiariaqartoq qulakkeerumallugu.

Suliniutissat tamakku meeqqanut inuusuttuaqqanullu suliat ataatsimoortunik siunnerfilimik iliuuseriniakkanut Naalakkersuisunit suliarineqartumut ilanngunneqassapput. Iliuuseriniakkat 2010-p ingerlanerani piareerseqassapput ilaqutariinnut atungarissaannginnerusunut siunnerfilimik suliaannut tunngasunik imaqartut, ilaatigut ilaqutariinnut sullissivinnut, ilaqutariit højskolertinneqartarnerinut meeqqaalu ornittagaannut kiisalu ilaqutariinnik allanik ikinnugteqartittalernissaannut atuarfimmilu tulaaffissaqalernissamut aaqqissuussinernut aningaasaliisoqassalluni.

Suliatigut sumiginnaanerit pinngitsoortinniarneqassapput, meeqqanut inuusuttuaqqanullu ilaqutariinnit atungarliornerusuneersunut imaluunniit ilinniarnertik pissutigalugu ilaqtaminnit ungasissorsuarmiittunut taamalu inersimasunut atassuteqarnissaminnut amigaatilinnut tapiissutit amerlineqassapput, kiisalu angajoqqaat angajoqqaajussutsimik paasisimasaqalersinniassallugit pisinnaanerminnillu upperinninnerat pigilersissallugu, taamaaliornikkut angajoqqaatut akisussaaffiup imaannaanngitsup tigusissaanut pisariaqartunik tunngavissinneqarsinnaammata. Inooqatigiinnermit kingornussatta pitsaanngitsut kipitinnissaat inuiaqatigiinni tamakkerluta ataatsimoorlulalu akisussaaffigisariaqarparput.

Taamaattumik Isumaginninnermut Naalakkersuisoqarfiup novembarip naalernerani nakuuserneq sammillugu ataatsimeersuartitsinissaani pissutsit taamaattut paqumigineqarneri ukkanneqassapput, ajornartorsiummi tamanna inuiaqatigiinni uatsinni innuttaasunilu ataasiakkaani annertoqimmat. Tamakku saniatigut inooqatigiinnermi akisussaaffeqarnerup isummerfigineqartarnera allanngortinniarlugu suliniuteqarnissamut 2010-mut aningaasanik illuartitsisoqarpoq.

Taamaattorli suliassat amerliartortinnarnerat naammangilaq; aammami suliat ataasiakkaat tamarmik qaffasissumik pitsaassuseqarnissaat qulakkeertariaqarparput, taamaattumillu Isumaginninnermut Naalakkersuisoqarfik uppernarsaatinik naliliinernillu katersinissaminik pingaarnerutitaqarusuppoq.

Pisariaqarportaaq suliassaqarfinnik isumaginninnermi suliassaqarfiit avataaniittunik arlalinnik peqataatitaqarnissaq, assersuutigalugu inuussutissarsiornermut, peqqissutsimut aamma ineqarnermut tunngasunik sulialinnik. Tamatumani tunngaviusussat tassaannaassanngillat Naalakkersuisoqarfiit kommunillu akornini qaninnerusumik suleqatigiinnissat aammali nunaqarfinni siulersuisut peqataatinneqartariaqarlutik.

Naalakkersuisut tunngaviusumik isumaqarput ilaqutariit pissakinnerit atugaasa nalinniginaasumik pitsaanerulersinneqarnerisigut inooqatigiinnermit kingornutavut pitsaanngitsut ikinnerulersissagai. Tamatumunngami peqatigitillugu Naalakkersuisut toqqaannarnerusunik siunertalinnik aallartitsisinnaaneq akuersaarnartutut isigaat.

Tulluurtutut sularineqarsinnaasut ilagaat ileqquliussanik soraarussinissamut suleqatigiiffiliornissaq, soorlu Demokraatinit tamanna siunnersuutigineqartoq. Suleqatigiiffiup taamaattup inuusuttut ileqquliussaannaanngitsunik periaaseqalernissaannut sunneeqaataaffigisinnaassavai, soorlu pissutsini namminneq ilisarimalluinnakkamillu ilinniagaqarnermut tunngasunik ileqqulersuutigisartagaanni.

Inooqatigiinnermilli kingornutatta pitsaanngitsut atorunnaarnissaat suliassaavoq oqimaatsoq sivisoorlu, tassami ilinniakkamik aalajangersimasumik toqqaanissamut sunnerneqarneq suliamut ukiorpassuarni atuuttussamut aallaqqaataannaavoq. Pingaaruteqarpoq ileqquliussanik soraarussinissamut suleqatigiit taama suliniarnermut ikorfartuiffissanik ilaqartissallugu, taamaaliornikkummi inuusuttuaqqat piumassuseqarnerat, kajumissusiat aammalu ilinniakkamik naammassinnikkiartuaarnissamut periarfissinneqarnissaat ataatsikkut qulakkiissagaluarpavut.

Taamaattumik inooqatigiinnermit kingornussarsiat pitsaanngitsut suussusiisa kiisalu taakkaa ikilisarneqarnissaannut suliassat suut pisariaqartinneqarnerisut ullumikkut oqallinnermi oqaluuserineqarnissaat neriuutigaara.

Oqallilluarisi!